

MAIGHISTIR-SGOILE—Fàilte, a dhaoine! Seadh, a Dhòmhnaill, dé tha cur oirbh an diugh? Tha còrr is uair a thìde bho chunnaic mi Donnchadh seachad air an tigh-sgoile is speal air a ghualainn—'s cha d'fhuair e seachad air so fhathast! Chan ann a' trod a bha sibh, a Dhonnchaidh?

DONNCHADH—Chan ann idir! Is mór a ghabhainn dol a throd ri Dòmhnall còir, a dh'aindeoin nam beachdan neònach a th'aige.

DOMHNALL—Na toiribh feairt air, a mhaighistir! Ach innsibh so dhomh. A bheil sibh am beachd gum faigh sinn gu bràth Pàrlamaid dhuinn féin an Albainn?

DONNCHADH—Tha ceist nas cudthromaiche na sin ann. Am biodh e 'na bhuannachd Pàrlamaid dhith féin a bhith an Albainn?

MAIGHISTIR-SGOILE—Nach ann agaibh a tha na ceistean, a dhaoine! Chan e Solamh a th'annamsa ann, na eadhon Iain Beag MacCormaig—.

DONNCHADH—Có esan?

DOMHNALL—Thà, nach eil cuimhne agad, am fear ud a bha ag iarraidh do'n Phàrlamaid air son na siorrachd so fhéin uair no dhà—fear-ùil na buidhne a tha sireadh gum bi còir aig Albainn air a cùisean féin òrdachadh gu dòigheil gun eisimeil do mhuinntir Lunnainn. Duine ceart!

MAIGHISTIR-SGOILE—Ceart no ceàrr e, chan eil teagamh nach eil ceist an fhéin-riaghlaidh air drùdhadh gu mór air móran de shluagh na dùthcha. 'S ann a tha an Riaghaltas an déidh Coimision Rìoghail a chur air bhonn mu'n chùis.

DONNCHADH—Gu dearbh, tha dùil agam gun do leugh mi rud-egin m'a thimcheall sin am *Paipear an Obain* o chionn ghoirid. Gu dé th'aca sin ri dhèanamh?

MAIGHISTIR-SGOILE—Tha aca ri rannsachadh mu'n dòigh anns a bheil Alba air a riaghladh. Tha mi cinnteach—ged nach eil so air a ràdh gu soilleir anns an t-seòladh a thugadh dhaibh—gum beachdaich iad air ciamar a dh'fhaodar na meadhonan-riaghlaidh an Albainn a dheanamh nas éifeachdaiche agus nas freagarraiche air suidheachadh is feuman na dùthcha.

DOMHNALL—Tha fhios gum feum iad breith a thoirt mu co-dhiùbh a bhiodh Pàrlamaid Albannach 'na meadhon-riaghlaidh a fhreagradh na b'fheàrr air an dùthaich na an aon Phàrlamaid Bhreatannach mar a th'againn an dràsda.

MAIGHISTIR-SGOILE—Faodaidh iad am barail a thoirt air a' cheann sin—ged nach eil òrdugh teann aca sin a dhèanamh.

DONNCHADH—Agus có iad na daoine foghainnteach is foghlumte a tha ri ceistean cho domhain dìomhair a chur an dara taobh?

MAIGHISTIR-SGOILE—Tha cóig buill dheug anns a' Choimision, agus Iarla Bhalfour air an ceann—am fear a b' àbhaist a bhith 'na cheann-suidhe air Bòrd a' Ghuail an Albainn. Duine làidir smachdail!

DONNCHADH—Cha b'fhuilear dha, bròinean! A bheil Gaidheil anns a' Choimision so?

MAIGHISTIR-SGOILE—Tha dithis. Tha Maidsear Iain Stirling, Fear Fharabraoin. Is esan Ceann-suidhe Comhairle Siorrachd Rois. Tha